

BINGANA YA YESU LONGAKA

Baleso ya Bible sambu na Bana

Dititi yai kele kaka sambu na nge, longi!

Mbote na nge, longi! Beto na MCE kele na kiese mingi na kupesa nge mbote na zina ya Mfumu na beto Yesu Kristo. Mbote nge tanga dititi yai na ntwala nge yantika kulonguka lesu ya ntete, sambu dititi yai ta songa nge inki mutindu na kusadila mukanda yai, ti inki mutindu na kulonguka baleso sambu na kulonga yo na bana.

INKI MUTINDU NGE LENDA SADILA MUKANDA YAI?

Mukanda yai ikele kaka guide sambu na kusadisa nge, longi, na kulonguka baleso yai, mpe na kuyidika baleso yai sambu na kulonga yo na bana. Kana nge zola na kumona malongi yonso ya baleso yai, nge fweti tala na kati ya Bible. Na ntwala ntangu ya nge fweti longa bana, mbote nge tanga mbote-mbote lesu ya nge ta longa. Tanga yo na kati ya Bible ti longuka yo mbote na kati ya Bible. Ebuna ntangu nge telema na ntwala ya bana kulonga, nge ta zaba lesu ya Bible mbote. Nge ta vanda na mpila ya kutubila bana malongi ya bingana yai. Nge ta balula ve malongi sambu nge ta zaba yo mbote.

MPILA IKELE VE KUSADILA KAKA MUKANDA YAI MPAMBA SAMBU NA KUYIDIKA MALONGI YA LESO!

Nge fweti longuka lesu na kati ya Bible ntete-ntete! Mukanda yai ta songa nge inki baverset nge fweti longuka sambu na konso lesu.

Beto me songa kikuma sambu na konso lesu. Kikuma ikele dilongi ya nene nge zola bana kusimba mbote na kati ya lesu. Mbote nge yindula mingi kikuma ya konso lesu, sambu nge ta sosa na bampila yonso na kutendula yo. Na mambu yonso ya nge ta sala, nge ta sosa mpila na kutendula dilongi yina sambu bana bakisa yo mbote, to kuvutukila yo sambu bo bamuka yo.

Na nima ya kuzaba lesu mbote-mbote, nge ta longa yo mutindu yai:

1. ***Kabisa lesu*** na bandambu ya nkufi, verse mosi to zole na konso ndambu.
2. Na konso ndambu, beto sala mambu yai ti bana:
 - A. **Kutanga verse** to, kana yo kele nda, kulonga mabanza na yo.
 - B. **Kuyula baquestio** sambu bana yindula mbote-mbote mambu ya bo me wa.

C. **Kusala mwa-théâtre** ya kusonga mambu ya lutaka kaka na ndambu ya baverse ya beto me tanga.

D. **Yimba** mambu ya beto me mona na mwa-kitini ya nkunga. Longi mosi ke tula ton ya nkunga yina. Yo fweti vanda ve nkunga ya bana ke zaba, sambu yo kele kaka kitini ya nkufi to phrase mosi. Yimba yo mbala ndambu mingi tii ntangu ya bana me simba yo mbote.

3. Na nsuka ya kulonga leso, tuba diaka **mabanza ya nene** ya leso yina.

4. Songa **devoir** sambu na bakristo. Yo ta vanda mfunu, na mposo na nima, na kulomba rapport sambu na devoir yina.

5. Longa **verse ya leso**. Bana ta longuka yo nswalu kana longi tula yo na nkunga.

6. Na ntwala bana basika, sala **invitation** na kubinga bana na Yesu ya me yamba Yandi ntete ve na luzingu na bo. Nge lenda sala invitation na bandinga bonso yai:

"Yesu zola gulusa nge bubu. Kana nge me yamba Yandi ntete ve bonso Ngulusi ti Mfumu na nge, kansi bubuyai nge zola yamba Yandi, ntangu bana ya nkaka basika, nge bikala awa (songa na inki kiti). Mono ta kwisa sadisa nge na kuzaba Yesu Kristo."

7. Na nima ya ecodim, nge fweti sadisa bana ya me ndima invitation, me kwenda kuvanda na sika ya nge me songa. Sadila bacarte ya kutwadisa, to tendula bo verse bonso Yoane 1:12. **Twadisa bo na bisambu sambu na kuyamba Yesu**, ye baka bazina na bo. Kana dibundu na nge kele na classe ya balandi, yai kele ntangu ya mbote ya bo lenda kota na yo.

BINGANA IKELE INKI?

Bantu yonso zola bahistoire. Bambuta ya Zaire vandaka ngolo na kulonga na bahistoire. Yesu mpe vandaka kulonga mutindu yina.

Bingana kele bahistoire ya ke longa mambu ya kieleka. Bingana ya Bible ke longa mambu ya Nzambi. Yo kele kutuba mambu ya ntoto yai, mambu ya bantu zaba ti bakisa nswalu. Kansi malongi na yo kele malongi ya kimpeve. Bingana ya Bible kele bahistoire ya ke tadila luzingu yai, kansi ke longa mambu ya kimpeve.

Mbote na luyantiku ya baleso yai kana nge tendula bana bingana kele inki, ti bambukisa bo mbala na mbala na bamposo ke kwisa ya nge kele kulonga baleso yai.

LESO 1 NTOTO YA MBOTE Matayo 13:1-9, 18-23

KIKUMA YA LESO: Yidika ntima sambu na kuyamba ti kulemvuka na ndinga ya Nzambi.

VERSE YA KULONGUKA: Matayo 22:37 (Ntima ya ke zola Nzambi ikele ntoto ya mbote.)

KUYANTIKA LESO: Songa bankeni. Losa yo na bisika na bisika. Yula bana kana KONSO nkeni ya bantu ke kunaka ke yelaka mbote. (Ikele ve.) Yesu tubaka kingana ya ke songa mpila bankeni ya nkaka ke yelaka kansi ya nkaka ke yelaka ve.

KULONGA LESO:

1. Yesu kotaka na bwatu. Yandi vandaka kulonga bantu mingi.

Tanga Matayo 13:1-3

Yula: Sambu na inki Yesu kotaka na bwatu? Yandi salaka inki na kati ya bwatu? Bantu ya waka Yesu vandaka wapi? Yesu longaka bo inki mutindu?

Sala théâtre: Yesu ke longi na bwatu

Yimba: Yesu kotaka na bwatu--sambu na kulonga bantu!

2. Kingana: Muntu kunaka nkeni, kansi yonso yelaka ve.

Tanga Matayo 13:4-7

Yula: Sambu na inki nkeni menaka ve kana yo kubwaka na nzila? Sambu na inki yo yelaka ve mbote kana yo kubwaka na zulu ya matadi? Sambu na inki yo yelaka ve mbote kana yo kubwaka na kati ya bansende?

Sala théâtre: Losa bankeni. Yo kele kubwa na bisika mutindu na mutindu.

Yimba: Muntu kwenda na kukuna bankeni mingi.

3. Bankeni ya nkaka yelaka mbote na ntoto ya mbote.

Tanga Matayo 13:8-9.

Yula: Sambu na inki benkeni ya nkaka yelaka mbote? Yina ya yelaka mbote salaka inki? Yo butaka inki mutindu?

Sala théâtre: Losa bankeni, songa na diboko bonso
yo kele kuyela mingi.

Yimba: Bankeni ya nkaka yelaka na ntoto ya mbote,
'buna yo butaka mingi!

4. Yesu yantikaka kutendula kingana yina.

Tanga Matayo 13:18-19.

Yula: Nkeni ya kubwaka na nzila kele kusonga inki?
Nani kele nswalu na kukatula mabanza ya nsangu ya mbote sambu
yo kota ve na ntima ya muntu?

Sala théâtre: Ndambu ya bana losa bankeni. Bana ya
nkaka kwisa nswalu na nima na kulokuta yo.

Yimba: Satana zola yiba malongi beto me wa, sambu beto
yindula yo diaka ve.

5. Yesu tendulaka bankeni ya bwaka na matadi.

Tanga Matayo 13:20-21

Yula: Nkeni ya kubwaka na matadi kele kusonga inki?
Keti nge me mona lukwikilu ya bakristo kubwa na ntangu
ya mpasi? Ntima na bo kele bonso inki? Bo ta buta
bambuma ya mbote?

Sala théâtre: Mwana mosi tuba nde yandi me yamba Yesu.
Mwana ya nkaka seka yandi, ebuna mwana ya ntete vutuka na nsoni.

Yimba: Kuvutuka, yo lunga ve na bakristo!

6. Yesu tendulaka bankeni ya bwaka na bansende.

Tanga Matayo 13:22

Yula: Nkeni ya kubwaka na bansende ke songa inki? Inki
mambu lenda kanga beto nzila nde beto yamba ve ndinga ya Nzambi
mbote-mbote?

Sala théâtre: Mwana mosi ke wa ndinga ya Nzambi, kansi yandi
kele yindula na ntima na yandi inki mutindu yandi lenda kuzwa
mbongo.

Yimba: Nzala ya mbongo ta yiba nge!

7. Yesu tendulaka bankeni ya bwaka na ntoto ya mbote.

Tanga Matayo 13:23

Every Child Ministries
(Ministères pour Chaque Enfant)

Yula: Nkeni ya kubwaka na ntoto ya mbote ke songa inki? Kana beto me yamba ndinga ya Nzambi mbote, inki ta monika na luzingu na beto? Keti bakristo yonso ta buta bambuma kiteso mosi?

Sala théâtre: Mwana mosi ke wa ndinga ya Nzambi. Yandi me vanda muyibi ya ngolo. Na nima, yandi vutula bima ya yandi me yibaka. Mwana ya zole ke wa ndinga ya Nzambi. Yandi me vanda munoko ya kufinga. Yandi kwenda kulomba bampangi kulolula yandi. Mwana ya tatu ke wa ndinga ya Nzambi. Yandi vandaka kusala kindoki. Yandi baka bansinga ti bima yonso na yandi ya kindoki, yandi yoka yo tiya.

MALONGI YA NENE YA LESO YAI: Ntangu beto kuwa ndinga ya Nzambi, mbote beto yamba yo na ntima na beto yonso. Ebuna beto ta vanda ntoto ya mbote ti beto ta buta bambuma mingi ya kimpeve ya ta pesa Nzambi kiese.

MALONGI YA BAKRISTO: Inki mutindu nge ke yambaka ndinga ya Nzambi? Keti nge me yidika ntima na nge na kuyamba yo mpe na kulemvuka na yo? Nge lenda samba Nzambi sesepiyai sambu na kuyidika ntima na nge?

KUBINGA BANA NA YESU: (*Longi, landa mbandu kele na luyantiku ya mukanda yai.*)

BANKUNGA YA KWENDA NZILA MOSI TI LESO:

O Keba Ntima Inki Nge Zola!

Kuwa Bible

LESO 2 MUNTU YA LUZOLO

Luka 7: 36-47

KIKUMA YA LESO: Mbote nge mukristo songa luzolo mingi na Nzambi sambu, kana nge me tula ntima na Yesu, Nzambi me lolula masumu na yandi yonso.

VERSE YA KULONGUKA: Matayo 22:37 diaka

KUYANTIKA LESO: Kusonga mulangi ya parfum to fleur ya nsudi ya mbote. Bana kuwa nsudi na yo. Yula bo kana bo ta losa parfum yina na makulu.

KULONGA LESO:

Every Child Ministries
(Ministères pour Chaque Enfant)

1. Nkento ya vandaka muntu ya masumu songaka luzolo ya nene sambu na Yesu.

Tanga: Luka 7: 36-38

Yula: Yesu vandaka kudia wapi? Nkento ya kwisaka vandaka nkento ya mbote to ya mbi? Yandi salaka inki? Inki basikaka na meso na yandi?

Sala théâtre: Mwana mosi vanda Yesu, bana ya nkak balonguki. Bo ke dia na nzo ya Farize mosi. Nkento kwisa, yandi losa parfum na makulu ya Yesu, yandi dila ngolo.

Yimba: Nkento dilaka masumu na yandi.

2. Simon vandaka kubokuta sambu na mambu yina.

Tanga: Luka 7: 39-40

Yula: Inki vandaka mabanza ya Simoni? Inki mutindu Yesu zabaka mabanza na yandi?

Sala théâtre: Mwana mosi songa luse ya makasi, songa mabanza ya mbi.

Yimba: Yesu zabaka mabanza ya Simoni!

3. Yesu songaka yandi kingana na kusonga nani ke zola muntu mingi.

Tanga: Luka 7:41-42

Yula: Bantu tatu kele na kati ya kingana yai. Bo kele banani? Inki diswaswanu na kati na bo? Inki questio Yesu yulaka?

Sala théâtre: Kusonga mfumu ke lolula bantu zole ya mfuka na bo. Bo ke kwenda na kiese.

Yimba: Nani muntu ya ta zola mingi?

4. Muntu ya ta zola mingi kele yina ya mfumu me lolula mfuka ya nene.

Tanga: Luka 7:43

Yula: Inki mvutu Simoni pesaka na questio ya Yesu?

Mvutu na yandi vandaka mbote? Sambu na inki nkento yina zolaka Yesu mingi?

Sala théâtre: Muntu mosi vanda Yesu, ya nkaka Simoni

Yimba: Muntu ke zolaka Yesu mingi, kele yina ya Yesu lolulaka mingi.

MALONGI YA NENE: Beto zola Yesu Kristo sambu masumu na beto vandaka nene, kansi Yandi lolulaka yo yonso.

MALONGI YA BAKRISTO: Solula inki mutindu bo lenda songa luzolo ya nene na bo sambu na Yesu. Ngindu mosi ikele kaka kusamba nde, "Yesu, mono zola nge."
Na nima sala theatre ke songa bana ke sala mambu ya beno me solula.

KUBINGA BANA NA YESU: Landa mbandu na luyantiku ya mukanda.

BANKUNGA YA KWENDA NZILA MOSI TI LESO:

O Keba Ntima Inki Nge Zola
Luzolo na mono na Yesu, Yo kele na nsuka ve-o
Zola Yesu! Na Kiese! (Kumisa Nzambi! Na Kiese!)
Mono Zola Nge Mingi, O Mfumu! (Yesu Ikele Awa)

LESO 3 MATITI YA MBOTE TI YA MBI Matayo 13:24-30, 36-51

KIKUMA YA LESO: Beto mona mpasi ve kuzenga nani kele bakristo ya kieleka sambu Nzambi ke zaba bantu na Yandi.

VERSE YA KULONGUKA: 2 Timoteo 2:19 (suka na "Mfumu Nzambi zaba bantu na Yandi.")

KUYANTIKA LESO: Songa dititi mosi ya kele mbote ti mosi ya kele ya mbi. Yula bana inki diswaswanu kele na kati na yo.

KULONGA LESO:

1. Kingana Yesu songaka: Kimfumu ya Nzambi ke fwanana na muntu kunaka nkeni ya mbote, kansi na nima, mbeni kwisaka kulosa bankeni ya mbi na kati.

Tanga: Matayo 13:24-25

Yula: Nkwa-bilanga kunaka bankeni ya inki mutindu?
Nani kunaka bankeni ya mbi?

Sala théâtre: Bana kuna bankeni ya mbote na bilanga.
Muntu mosi ya mbi kwisa na nima na kinsweki yonso,
yandi losa bankeni ya mbi.

Yimba: Mbeni losaka bankeni ya mbi.

2. Ntangu yo menaka, bantu ya kisalu zolaka katula yina ya mbi.

Tanga: Matayo 13:26-28

Yula: Bantu ya kisalu yulaka inki questio? Nani me sala mambu yina? Bantu ya kisalu zola sala inki?

Sala théâtre: Bantu ya kisalu mona matiti ya mbi ti bo kele na makasi. Bo zola katula yo.

Yimba: Bantu ya kisalu zolaka katula matiti ya mbi.

3. Nkwa bilanga buyaka--yo ta botula mpi matiti ya mbote.

Tanga: Matayo 13: 29-30

Yula: Sambu na inki nkwa-bilanga buyaka nde bo katula matiti ya mbi nswalu? Bo ta katula yo na inki ntangu? Na ntangu bo katula bima kele na bilanga, bo ta sala inki ti matiti ya mbote? Inki ti matitit ya mbi?

Sala théâtre: Ntangu bo ta katula bima kele na jardin

Yimba: Beno botula yo ve nswalu--beno ta botula yo na nima.

4. Yesu tendulaka kingana yai.

Tanga: Matayo 13:36-37

Yula: Balonguki lombaka Yesu kusala inki? Yesu tubaka nde muntu ya kunaka bilanga ikele nani?

Sala théâtre: Muntu mosi kuna bankeni. Yula bana nani muntu ke kuna bankeni. Mvutu: Yesu!

Yimba: Nkwa ya bilanga kele Yesu!

5. Bawanzio ta katula bantu ya mbi na nsuka ya ntoto.

Tanga: Matayo 13:39-42

Yula: Mbeni ya kunaka bankeni ya mbi kele nani? Ntangu bo ke kwenda kukatula bambuma kele inki ntangu? Bo ya ke katulaka bambuma kele banani? Bambuma ya mbi kele banani? Bawanzio ta sala inki ti bantu ya mbi?

Sala théâtre: Ndambu ya bana kele bantu ya mbi ya me yamba Yesu ve. Bo kele kusala mambu ya mbi mutindu na mutindu. Na nsuka ya ntoto, bawanzio kwisa kukanga bo, kulosa bo na tiya.

Yimba: Bawanzio ta kanga bantu ya mbi, na nsuka ya ntoto--o mawa!

6. Bantu ya Nzambi ta baka lukumu.

Tanga: Matayo 13:43

Yula: Inki ta vanda nsuka ya bantu ya Nzambi? Inki mutindu nsuka na bo kele ya diswaswanu ti bantu ya mbi?

Sala théâtre: Bana vanda na zulu ya kiti na lukumu yonso. Bo lwatisa bo mpu ya lukumu.

Yimba: Bantu ya Nzambi ta baka lukumu, na nsuka ya ntoto, o kiese mingi!

MALONGI YA NENE: Ntangu yai bakristo ya kieleka ya kele bantu ya Nzambi kele sikamosi na dibundu ti bantu ya zaba Nzambi kaka na munoko na bo, kansi ya kieleka ve. Yo kele mpasi mingi kuzenga sesepiyai nani kele ya kieleka ti nani kele ya kieleka ve, sambu beto ke zaba ve ntima ya bantu. Kansi Nzambi zaba nani kele bantu na Yandi. Na nsuka ya ntoto, bawanzio ta zenga nani kele muntu ya Nzambi.

MALONGI YA BAKRISTO: Beto mona mpasi ve sambu bantu yonso ya tuba bo kele bakristo ke monikaka ve bonso bantu ya kieleka. Beto bika bo na maboko ya Nzambi sambu Yandi zaba nani kele bantu na Yandi. Beto meka ve kuzenga nani kele mukristo to mukristo ve, sambu mbaimbai beto ta sala kifu. Bawanzio ya Nzambi ta sala kisalu yai na nsuka ya ntoto. Sala theatre ke songa muntu ke na mpasi sambu yandi ke yindula nde bakristo kele kieleka ve. Mpangi ya nkaka songa yandi malongi yai, ebuna bo tula yo na maboko ya Nzambi.

KUBINGA BANA NA YESU: Ata yo kele mpasi na beto kuzaba nani kele mukristo ya kieleka, yo kele mpasi ve na Nzambi. Yandi zaba kana nge me yamba Yesu ya kieleka to kana nge kele kaka kukusa. Kana nge ke na mfunu kuyamba Yesu bubu na kieleka yonso, mono ta zola solula ti nge na nima ya ecodim.

LESO 4 YESU TA BAKA BANTU NA YANDI **Luka 17:26-30,34-36**

KIKUMA YA LESO: Mbote muntu na muntu zikisa mbote kana kieleka yandi kele mwana ya Nzambi, sambu na lumbu ya Yesu ta kwisa vutuka, Yandi ta baka bantu na Yandi, kansi bantu ya nkaka ta bikala, bo ta mona makasi ya Nzambi.

VERSE YA KULONGUKA: Yoane 14:3

Every Child Ministries
(Ministères pour Chaque Enfant)



KUYANTIKA LESO: Sala theatre bonso Yesu ke vutuka. Mwana ya kele Yesu telema na zulu ya mesa. Binga bana ya nkaka bo kwisa na Yandi, kansi ya nkaka bikala. Bo ya bikala ke na boma, ke dila, bo ya Yandi binga kele na kiese.

KULONGA LESO:

1. Yesu ke songa yo ta vanda inki mutindu na ntangu Yandi kwisa.

Tanga: Luka 17:26-27

Yula: Yesu ke tuba nde ntangu Yandi vutuka, yo ta vanda bonso na bilumbu na ntwala inki salamaka? Bantu vandaka kuyindula Nzambi ve, kansi bo vandaka kaka kuyindula inki?

Sala théâtre: Bantu ke sakana mingi, ebuna mvula yantika kunoka, masa fuluka na ntoto ti kufwa bo yonso.

Yimba: Bantu mingi ta yilama ve, kansi Yesu ta kwisa!

2. Bantu ta yindula ve nde Yesu ta kwisa, kansi Yandi ta kwisa kuvutuka.

Tanga: Luka 17:28-30

Yula: Loti kwendaka kuzinga na bwala ya mbi Sodomi. Bantu kuna vandaka kuyindula inki mambu? Nzambi basisaka Loti ti fami na yandi, ebuna yandi fwaka bantu ya Sodomi na inki? Keti bo banzaka nde Nzambi ta kufwa bo?

Sala théâtre: Bantu ya Sodomi ke sakana mingi na mbi na bo. Wanzio basisa Loti ti fami na yandi, ebuna Nzambi nokila bantu ya Sodomi tiya, bo yonso kufwa.

Yimba: Bantu mingi ta yilama ve, kansi Yesu ta kwisa!

3. Kiteso mosi, Yesu ta kwisa nswalu na ntangu ya bantu ke yindula ve, kansi bantu yonso ta kwenda ve ti Yandi.

Tanga: Luka 17: 34

Yula: Bantu zole ta vanda wapi ntangu Yesu ta kwisa? Bo ta vanda kusala inki? Ikwa ta kwenda? Yina ya kwenda ve ti Yesu, yandi ta sala inki? Inki kele diswaswanu na kati ya bantu ya zole? (Mosi yambaka Yesu ti mosi yambaka Yandi ve.)

Sala théâtre: Ke songa bana zole ke lala mpongi, mosi kwenda ti Yesu ti mosi kwenda ve.

Yimba: Bantu zole na zulu ya mbeto--mosi ta kwenda ti

mosi ta bikala!

4. Bakristo ta kwenda kuvanda ti Yesu, kansi bo ya zaba Yesu ve, bo ta kwenda ve.

Tanga: Luka 17:35

Yula: Bantu zole ta vanda kusala inki ntangu Yesu ta kwisa? Keti bo yonso zole ta kwenda ti Yesu? Yina ya ta kwenda ikele yina ya me sala inki?

Sala théâtre: Ke songa bamama zole ke tuta manioko. Mosi kwenda ti Yesu ti mosi kwenda ve.

Yimba: Bamama zole kele kututa manioko--mosi ta kwenda ti mosi ta bikala!

5. Kiese na bo ya ta kwenda ti Yesu, mawa na bo ya ta bikala!

Tanga: Luka 17:36

Yula: Babakala zole ta vanda wapi ntangu Yesu vutuka? Nge banza bo ta vanda kusala inki? Keti bo yonso zole ta kwenda ti Yesu?

Sala théâtre: Babakala zole kele sala na bilanga. Mosi ta kwenda ti Yesu ti mosi ta bikala.

Yimba: Babakala zole kele na bilanga--mosi ta kwenda ti mosi ta bikala!

MALONGI YA NENE: Bakristo ta kwenda ti Yesu ntangu Yandi ta vutuka.

MALONGI YA BAKRISTO: Beto zola kuzinga na kintwadi ya mbote ti Yesu sambu beto vanda ve na nsoni ntangu Yandi ta kwisa vutuka. Keti mpila nge ke zinga ta pesa nsoni kana Yesu kuta nge na mambu yina? Sala theatre ke songa bana ya nkaka ke sala mambu ya mbi, ke mona nsoni ntangu Yesu kuta bo. Groupe ya zole ke sala mambu ya mbote, ke mona kiese ntangu Yesu kuta bo.

KUBINGA BANA NA YESU: Kana nge me yamba Yesu na ntima na nge ntete ve, nge ta kwenda ve ti Yesu na ntangu Yandi ta kwisa vutuka. Mbote nge yamba Yesu bubuyai, sambu Yesu ta ndima nge na lumbu Yandi ta vutuka. Mono ta vanda na kiese na kusadisa nge na nima ya ecodim.

BANKUNGA YA KWENDA NZILA MOSI TI LESO:

Yesu Kristo, Mfumu 'a Beto Ta Kwisa Diaka (Kintwadi No. 165)

Sika ya Kiese Ke Zulu

Mono Kele na Nzo Kitoko

Every Child Ministries

(Ministères pour Chaque Enfant)



Mo' Kwikila Bible-verse ya nsuka, Yesu kele kwisa

BIMA YA KUSONGA: Basika na nganda, tala matuti na zulu. Yesu tombukaka na kati ya matuti; Yandi me sila nde Yandi ta vutuka kiteso mosi.

LESO 5 MAMBU YA FIOTI LENDA VANDA MFUNU MINGI Marko 4:26-32

KIKUMA YA LESO: Zaba nde, mambu ya kimpeve kele mfunu mingi, ata bantu mona yo mfunu mingi ve. Mbote beto sosa ntete kimfumu ya Nzambi--kupesa kiese na Mfumu na beto.

VERSE YA KULONGUKA: Matayo 6:20

KUYANTIKA LESO: Songa bankeni ya fioti-fioti. Losa mosi na zelo, songa mpila yo kele mpasi kumona yo. Yo kele kima mosi ya fioti, ke monikaka bonso mfunu ve. Kansi yo kele mfunu mingi, sambu kana yo yela yo ta buta nti to matiti ya nene.

KULONGA LESO:

1. Kimfumu ya Nzambi ke fwanana na nkeni ya kele na ntoto. Yo mosi kele kumena, kuyela, kubuta.

Tanga: Marko 4:26-27

Yula: Inki mutindu nkeni kele kusonga kimfumu ya Nzambi? Nani lenda bakisa mpila nkeni kele kumena na ntoto?

Sala théâtre: Muntu kuna bilanga, na nima yandi vutuka kumona mpila bankeni kele kumena.

Yimba: Kimfumu ya Nzambi kele kuyela bonso nkeni!

2. Kimfumu ya Nzambi lenda vutuka na nima ve. Yo kele kuyela kaka konso ntangu.

Tanga: Marko 4:28-29

Yula: Kana nkeni me yela, na nsuka nge ta baka inki?

Sala théâtre: Katula bambuma kele na bilanga.

Yimba: Kimfumu ya Nzambi kele kuyela bonso nkeni!

3. Kimfumu ya Nzambi ke fwanana na nkeni mosi ya kuluta fioti. Yo kele

kele monikaka bonso kima mosi ya mpamba, kansi kana yo me yela yo kuma nti mosi ya nene ti ya mfunu.

Tanga: Marko 4:30-32

Yula: Keti nkeni ya fioti ke monika bonso kima ya mfunu mingi? Kansi kana yo yela, keti yo ta vanda diaka fioti? Yo ta vanda inki mutindu?

Sala théâtre: Bantu kuna nkeni ya fioti, na nima bo yituka na nti ya nene ya me yela na yo.

Yimba: Kimfumu ya Nzambi me luta mfunu--yo ikele mambu ya nene!

MALONGI YA NENE: Ata bantu mona mambu ya kimpeve mfunu mingi ve, yo kele mambu mosi ya kuluta mfunu. Sesepiyai yo ke monika bonso nkeni ya fioti, ya mpamba. Kansi na lumbu ya Yesu ta kwisa kuyala, bantu yonso ta mona nde yo vandaka mambu ya kuluta mfunu.

MALONGI YA BAKRISTO: Mbote beto sosa ntete kimfumu ya Nzambi--inki mutindu beto lenda pesa kiese na Mfumu na beto. Bana tuba mambu ya lenda pesa Mfumu kiese--sonika yo na tableau. Meka kusala liste ya mambu kumi. (Longi, binga bana kumi na kusonga mambu yina na mwa-theatre.)

KUBINGA BANA NA YESU: Mbala ya nkaka nge me mona mambu ya Nzambi kima ya mfunu mingi ve. Yo yina nge me yamba Yesu ntete ve na luzingu na nge. Kansi bubu nge zola kuyamba Yandi. Mono ta vanda na kiese na kusolula ti nge na nima ya ecodim bubuyai.

BANKUNGA YA KWENDA NZILA MOSI TI LESO:

Sosa Ntete Kimfumu ya Zulu

Mwini Fioti na Mono, Bika Yo Monika

Moyo, Batata Moyo

LESO 6 BETO LOLULA BETO NA BETO

Matayo 18:21-35

KIKUMA YA LESO: Nzambi zola nge kuwila bantu ya nkaka mawa, mutindu Yandi wilaka nge mawa. Kana nge me yamba Yesu Kristo, Nzambi me lolula mbi yonso ya nge salaka Yandi. Yo yina nge mpe lolula bantu ya nkaka ya me sala nge mbi.

VERSE YA KULONGUKA: Matayo 18:33

KUYANTIKA LESO: Sala theatre ya mwana ya zola ve lolula mpangi na yandi mbi ya yandi me sala. Tuba nde yandi kele na mfunu na kuwa

kingana mosi ya Yesu longaka.

KULONGA LESO:

1. Piere zolaka kuzaba mbala ikwa yandi fweti lolula mpangi na yandi.

Tanga: Matayo 18:21-22

Yula: Piere banzaka nde yandi lenda lolula muntu mbala ikwa? Inki vandaka mabanza ya Yesu? 70x7 ikele mbala ikwa? Kana muntu meka kubambuka mbala ikwa yandi me lolula muntu, yandi lenda bambuka mbala yina yonso? Inki Yesu zolaka kutuba?

Sala Théâtre: Piere yula questio na Yesu, Yesu pesa mvutu.

Yimba: Beto lolula muntu mbala ikwa? Beto lolula muntu mbala mingi!

2. Yesu songaka kingana kusonga mpila beto fweti lolula muntu: Mfumu kangaka sielo ya vandaka na mfuka ya nene.

Tanga: Matayo 18:23-24

Yula: Sielo vandaka na mfuka ya ikwa? Yandi fweti futa yo na nani?

Sala Théâtre: Mfumu ke tala rapport ya kisalu, ke mona ke sielo mosi ke na mfuka ya nene. Yandi binga sielo yina.

Yimba: Sielo mosi vandaka na mfuka ya nene!

3. Sielo yina bondila Mfumu kuwila yandi mawa.

Tanga: Matayo 18:25-26

Yula: Inki mutindu mfumu zolaka sielo kumanisa mfuka na yandi? Inki mutinbdu sielo bondilaka mfumu? Yandi silaka kumanisa ikwa ya mfuka na yandi?

Sala Théâtre: Mfumu ke na makasi sambu na mfuka, ke songa bantu ya yandi kusimba bakala, nkento, ti bana, bo yonso kuma bampika na yandi. Kansi sielo kudilosa na ntoto, yandi bondila Mfumu ngolo kuwila yandi mawa.

Yimba: Mfumu nde, Beno ta kuma bampika! Sielo nde, Wila mono mawa!

4. Mfumu wilaka yandi mawa.

Tanga: Matayo 18:27

Every Child Ministries
(Ministères pour Chaque Enfant)

Yula: Mfumu zengaka mambu yai inki mutindu?

Sala Théâtre: Mfumu lolula sielo na yandi.

Yimba: Mfumu lolulaka yandi mfuka.

5. Na nima, sielo yina monaka muntu ya vandaka na yandi mfuka ya fioti, ebuna yandi kangaka muntu yina na kingolo-ngolo.

Tanga: Matayo 18:28

Yula: Sielo monaka nani? Mfuka ya muntu yina vandaka inki mutindu? Yandi salaka yandi inki?

Sala Théâtre: Sielo kanga muntu ya nkaka sambu na mfuka na yandi ya fioti.

Yimba: Sielo kangaka muntu ya nkaka.

6. Sielo buyaka kuwila muntu yina mawa.

Tanga: Matayo 18: 29-30

Yula: Muntu ya vandaka na mfuka, yandi bondila sielo inki mutindu? Keti kudila na yandi vandaka kiteso mosi bonso sielo dilaka na mfumu na yandi, to yo vandaka mutindu ya nkaka? Inki vandaka mvuta ya sielo?

Sala Théâtre: Muntu ya mfuka ke bondila sielo kuwila yandi mawa, sielo ke buya, losa muntu yina ya boloko.

Yimba: Sielo buyaka kulolula yandi.

7. Ntangu mfumu waka yo, yandi vandaka na makasi, yandi lombaka diaka mfuka na yandi.

Tanga: Matayo 18: 31-34

Yula: Inki mutindu mfumu zabaka mambu yai? Inki mutindu yandi monaka yo? Sambu na inki yandi vandaka na makasi? Inki ndola yandi pesaka na sielo yina?

Sala Théâtre: Mfumu kuwa mambu yina, ke na makasi. Yandi songa nde bo kanga sielo, bo bula yandi fimbu tii yandi manisa mfuka na yandi.

Yimba: O sielo! Bo lolulaka nge mfuka! Mbote nge lolulaka mpangi ya nkaka!

8. Yesu tubaka nde, kana beto lolula ve bantu ya nkaka, Nzambi ta lolula beto mpe ve.

Tanga: Matayo 18: 35

Yula: Kana beto zola Nzambi kulolula beto, beto fweti sala inki?

Sala Théâtre: Yesu ke longa bantu nde beto fweti lolula bantu ya nkaka.

Yimba: Beto lolula bantu ya nkaka, ebuna Nzambi ta lolula beto.

MALONGI YA NENE: Nzambi me lolula beto bakristo mfuka ya nene: masumu yonso na beto. Ebuna Yandi zola beto kulolula mpe bantu ya nkaka ya me sala beto mbi.

MALONGI YA BAKRISTO: Beto lolula beto na beto. Manisa theatre ya beno salaka na luyantiku. Muntu yina ta lolula mpangi na yandi ti bo ta vanda banduku diaka. Vanda na ntangu ya lombilu ya bana lenda tanga na ntwala ya Nzambi bantu ya bo zola lolula. Pesa bo devoir kukwenda na bantu yina kusala bo mbote to kusala kinduku diaka.

KUBINGA BANA NA YESU: Nzambi me lolula masumu ya beto bakristo. Kansi kana nge me yamba Yesu ntete ve na ntima na nge, Yandi me lolula masumu na nge ve. Nge me bikala kaka na masumu na nge. Kansi bubuyai Nzambi zola lolula nge. Yo ke lomba nge yamba Yesu Kristo na ntima na nge. Mono ta vanda na kiese na kusolula ti nge na nima ya ecodim sambu na mambu yai.

BANKUNGA YA KWENDA NZILA MOSI TI LESO:

Kizitu Yonso

Kwisa na Yesu Kristo, verse 2--Menga na Yandi ta lunga, kukatula imbi!

Beto Zolana

Zola, Beto Baka Yo

LESO 7 BANTU YA KISALU WILA MPANGI NA BO KIMPALA Matayo 20:1-15

KIKUMA YA LESO: Beto kuwa kimpala ve sambu na mambu ya mbote ke kwisila bantu ya nkaka. Beto vanda na kiese sambu na bo.

VERSE YA KULONGUKA: Kitoko 8:6b

KUYANTIKA LESO: Sala théâtre ke songa bantu kele na kimpala sambu na bampangi na bo. Tuba nde bo ke na mfunu na kulonguka kingana ya

Every Child Ministries
(Ministères pour Chaque Enfant)

Yesu vandaka kutuba:

KULONGA LESO:

1. Muntu wakanaka ti bantu ya kisalu sambu na lufutu ya lumbu mosi ya kisalu.

Kutanga: Matayo 20:1-2

Kuyula: Bantu ya kisalu yantikaka kisalu ntete na inki l'heure? Bo ta baka inki salaire? Keti bo ndimaka lufutu yina?

Kusala Théâtre: Muntu sosa bantu na kusala lumbu mosi na bilanga na yandi, bo wakana na lufutu.

Kuyimba: Bantu ya kisalu yantikaka na suka, bo me wakana na lufutu na bo.

2. Na nima ya ntangu yandi tindaka bantu ya nkaka mbala iya.

Kutanga: Matayo 20:3-5

Kuyula: Kimvuka ya zole ya bantu ya kisalu yantikaka na inki ntangu? Mfumu monaka bo wapi? Bo wakanaka inki mutindu na mambu ya lufutu? Kimvuka ya zole yantikaka na inki ntangu? Kimvuka ya tatu? Kimvuka ya iya? Bo wakanaka inki mutindu na mambu ya lufutu?

Kusala Théâtre: Mfumu sosa bantu ya kisalu ya nkaka ti yandi tinda bo na bilanga mbala tatu.

Kuyimba: Bantu ya nkaka yantikaka na nima.

3. Na nsuka ya lumbu, yandi futaka bo yonso kiteso mosi.

Kutanga: Matayo 20:7-10

Kuyula: Bo futaka nani ntete? Nani na nima? Bo futaka bo yonso ikwa? Keti yai vandaka mpila bo me wakana?

Kusala Théâtre: Bo futa bantu yonso kiteso mosi.

Kuyimba: Bo futaka konso muntu kiteso mosi.

4. Bantu ya salaka kuluta vandaka na makasi, bo wilaka bantu ya nkaka kimpala sambu bo bakaka lufutu kiteso mosi bonso bo.

Kutanga: Matayo 20:11-12

Kuyula: Bantu ya yantikaka kisalu na suka monaka yo inki

mutindu? Bo salaka inki?

Kusala Théâtre: Bantu ya ksalu ya ntete kele kubokuta.

Kuyimba: Bantu vandaka kubokuta mingi.

5. Kansi mfumu ya ksalu tubaka nde, ve, mono me pesa beno yina ya beto me wakana. Kana mono wila bo mawa, beno lenda wila bo kimpala ve.

Kutanga: Matayo 20:13-15

Kuyula: Inki mvutu mfumu pesaka bo? Keti yandi kusaka bo? Keti yandi yibaka bo? Kaka na bo ya yantikaka ksalu na nima, yandi wilaka bo inki? (Mawa)

Kusala Théâtre: Mfumu ke pesa mvutu na yandi.

Kuyimba: Nzambi kele kuzola kimpala ve!

MALONGI YA NENE: Bantu ya ksalu ya ntete vandaka na kimpala kaka sambu mfumu ya ksalu wilaka bantu ya nkaka mawa. Mbote bo vandaka na kiese sambu na bampangi yina, kansi bo wilaka bo kimpala. Kimpala yina vandaka mbote ve.

MALONGI YA BAKRISTO: Solula inki mambu bo ke wa kimpala. Solula Nzambi zola bo kumona yo inki mutindu? (Kuvanda na kiese sambu na mambote ya ke kwisa na bantu ya nkaka.) Songa theatre ke songa mpila ya mbote kusala ti kutuba kana mpangi na nge me mona mambu ya mbote, ata nge me mona yo ve. Lomba lusadusu ya Nzambi na mambu yai.

KUBINGA BANA NA YESU: Mambu yai kele ngolo, kana nge me yamba Yesu ntete ve na ntima na nge, nge ta vanda na mpila ve kulungisa yina ya Nzambi ke zola. Kana nge ke sosa kaka bubu kutula ntima na Yesu, kuyamba Yandi bonso Mvulusi ti Mfumu na nge, mono ta vanda na kiese kusolula ti nge na nima ya ecodim.

BANKUNGA YA KWENDA NZILA MOSI TI LESO:

O Keba Ntima (Kimpala ve!)

Beto Zolana

Zola, Beto Baka Yo

O Kimpala Yambula

**LESO 8 NZO YA TELEMAKA, TI NZO YA
BWAKA Luka 6:46-49**

Every Child Ministries
(Ministères pour Chaque Enfant)

KIKUMA YA LESO: Lukwikilu ya kieleka ke monikaka na mpila muntu ke lemfuka na Yesu. Beto kundima mpamba ve, kansi beto lemfuka na Yesu na yonso Yandi zola songa beto.

VERSE YA KULONGUKA: Luka 6:46

KUYANTIKA LESO: Sala theatre ke songa bana zole ke wa ndinga ya Nzambi. Na nima, bo basika na nzo Nzambi. Mosi kele lemfuka na Nzambi, mosi ke sala mambu mingi ya potopoto. Yula bana keti bo yonso zole waka ndinga ya Nzambi. Yula bo diaka inki diswaswani kele na kati na bo zole.

KULONGA LESO:

1. Yesu nganinaka bantu, "Sambu na inki beno ke binga mono, Mfumu, kansi beto lemfuka ve na yina Mono tuba?"

Tanga: Luka 6:46

Yula: Inki questio Yesu yulaka bantu? Sambu na inki Yesu vandaka na kiese ve? Kana muntu kele mfumu, beto fweti lemfuka na yandi? Kana beto lemfuka na Yesu ve, yo kele kusonga inki?

Sala Théâtre: Bantu binga Yesu Mfumu, ebuna yandi yula bo qustion yai.

Yimba: Yimba Luka 6:46 na nkunga

2. Yesu tubaka kingana yai kusonga inki mutindu bantu kele ya kuwa ndinga na Yandi ti sala yina ya bo kuwa:

a. Muntu tungaka nzo. Yandi timaka ntoto na nsi mingi, yandi tulaka nzo na fondement ya matadi.

Tanga: Luka 6:48a

b. Mvula nokaka ngolo, kansi masa fwaka nzo yina ve.

Tanga: Luka 6:48b

Yula: Muntu ya lemfuka na Yesu kele bonso nani? Nzo ya bo me tunga na zulu ya ditadi, yo ta kubwa nswalu? Yo ta vanda inki mutindu?

Sala Théâtre: Tima dibulu, sala fondement ya ngolo ya ciment. Tunga nzo na zulu na yo. Masa ya ngolo bula nzo yina, kansi yo kubwa ve.

Yimba: Bo tungaka nzo na zulu ya matodi--yo kubwaka ve!

3. Yesu tubaka nde bantu ya kuwa ndinga na Yandi kansi bo sala ve yina ya bo me wa, ke fwanana na muntu ya tungaka nzo na zulu ya zelo.

Tanga: Luka 6:49

Yula: Muntu ya lemfuka na Yesu kele bonso nani? Nzo ya bo me tunga na zulu ya zelo, kukonda fondement, yo ta vanda inki mutindu? Inki lenda bebisa yo nswalu?

Sala Théâtre: Tunga nzo kaka mpidina, kukonda fondement. Masa ti mupepe ya ngolo bula yo, nzo yonso kubwa na ntoto.

Yimba: Bo tungaka nzo na zulu ya zelo--o-o-yo kubwaka ngolo!

MALONGI YA NENE: Bantu ya lemfuka na ndinga ya Yesu kele bonso bantu ya tunga nzo ya ngolo na zulu ya ditadi.

MALONGI YA BAKRISTO: Yo kele mbote na kuwa ndinga ya Nzambi. Kansi konso ntangu beto kuwa yo, Yesu ke lomba beto kukwenda kusala yina ya beto me longuka. Solula inki malongi bo me wa na ngonda me luta (na ecodim, bisambu, bisambu ya ecole, etc.). Solula inki mutindu bo lenda sala yina ya bo me longuka.

KUBINGA BANA NA YESU: Mambu ya ntete-ntete ya Yesu kele kulomba ya konso muntu ikele kuyamba Yandi na ntima, kundima Yandi bonso Mvulusi ti Mfumu. Kana nge me kwikila Yesu ntete ve, yonso ya nge sala lenda pesa Yandi kiese ve. Kana nge me bakisa nde, nge me ndima Yandi ntete ve, kansi bubu nge zola ndima Yandi, mono ta solula ti nge na nima ya ecodim.

BANKUNGA YA KWENDA NZILA MOSI TI LESO:

Tula Ntima na Kulemfuka (Kintwadi No. 2)
Kumisa Nzambi na Kiese (verse 2--Lemfuka bubu, na kiese!)

BIMA YA KUSONGA:

Kana nzo ya mbote ti nzo ya kubwa kele penepene, beno basika, kwenda kutala yo. Songa bana nde bo ya sala ve malongi ya bo ke wa, luzingu na bo ta vanda bonso nzo yina ya kubwa.

To, songa zelo ti ditadi ou kitini ya ciment. Yula bana inki ta vanda fondement ya mbote sambu na kutunga nzo ya nene--zelo to ciment.

LESO 9 INKI ME LUTA MFUNU--YINA BETO

TUBA TO YINA BETO SALA?

Matayo 21:28-32

KIKUMA YA LESO: Zaba nde, lukwikilu ya kieleka ikele ve kaka kundima na munoko. Lukwikilu ya kieleka ke monikaka mpe na bisalu ya muntu ke sala.

VERSE YA KULONGUKA: Luka 6:46 diaka

KUYANTIKA LESO: Kusala theatre ke songa bana ke sila bima mingi na munoko, na kati na yo bo ke sila mpe na kulanda Yesu. Kansi na nima, bo lungisa ve yina ya bo me sila.

MALONGI YA NENE: Yesu longaka kingana yai:

1. Na kati ya bana zole, mwana mosi buyaka kusala na bilanga ya tata, kansi na nima yandi balulaka, yandi salaka.

Tanga: Matayo 21:28-29

Yula: Tata vandaka na bana ikwa? Yandi lombaka bo kusala inki? Mwana ya ntete vutulaka inki? Kansi na nima yandi salaka inki?

Kusala Théâtre: Tata binga bana zole. Yandi songa mwana mosi kukwenda kusala na bilanga. Mwana buya. Tata basika. Na nima, mwana yindula diaka, yandi balula mabanza na yandi, yandi kwenda kusala na bilanga.

Yimba: Mwana mosi buyaka, na nima balulaka, yandi kwendaka kusala na bilanga.

2. Mwana ya zole silaka nde yandi ta sala, kansi yandi salaka ve.

Tanga: Matayo 21:30

Yula: Inki vandaka mvutu ya mwana ya zole? Keti yandi salaka yina ya yandi silaka?

Kusala Théâtre: Tata songa mwana ya zole kukwenda kusala na bilanga. Mwana ndima, tata basika. Na nima, mwana kwenda ve kusala yina ya yandi silaka.

Yimba: Mwana ya zole silaka, Mono ta kwenda! Kansi yandi salaka kima ve.

3. Yesu yulaka, na kati ya bana yai zole, nani salaka luzolo ya tata?

Tanga: Matayo 21:31a

Yula: Inki beno banza? Nani salaka luzolo ya tata?

Kusala Théâtre: Bana zole telema--yina ya salaka ti yina ya salaka ve. Bana ya nkaka songa nani salaka luzolo ya tata.

Yimba: Nani salaka luzolo ya tata? Mwana ya lemfukaka na yandi!

MALONGI YA NENE: Bantu mingi tuba nde bo ta landa Yesu, bo ta lemfuka na yandi. Kansi yina ya beto tuba kele mfunu mingi ve, yina ya beto sala kele mfunu mingi.

MALONGI YA BAKRISTO: Sala théâtre ke songa mwana ya ke yindula kutuba luvunu to ve. Yandi banza yandi lenda basika na problème kana yandi tuba luvunu, kansi yandi bambuka nde yandi me sila kulanda Yesu. Yandi zenga kutuba mambu ya kieleka.

KUBINGA BANA NA YESU: Mbala ya nkaka nge me tuba bima mingi na munoko, kansi nge me zenga ntete ve na ntima na nge nde nge fweti landa Yesu. Nge me yamba Yandi ntete ve na ntima na nge. Ntangu ya mbote, yo yai. Bikala sika nge ikele na nima ya ecodim, ebuna mono ta kwisa kusadisa nge.